

菜園村村民陳錦清反對清拆菜園村的意見書

我叫陳錦清，花名陳波，今年73歲，在1961年由東莞樟木頭偷渡來香港，用左四日五夜，先至來到香港，就好似好多人一樣，來呢度唔係想發達，而係想搵兩餐啫。

我老豆遲我一年來，同我係菜園村住，佢開始養雞、養鵝、養豬，而我就學師三年，學滿師出來做嘢，辛辛苦苦做左幾十年，在呢度安居樂業，而家就要拆，辛勞咁多年要拆，堅決唔搬架啦。

我間屋六百幾呎，開始時木屋，後來變石屋，打風落雨，水浸到膝頭，老鼠由地底上來，太太來了十年，仲有一仔一女都一齊住，未過門的新抱將來都會一齊住架啦，你話你地又遠又隔涉，又多蚊，但起碼負擔得來，可以安居樂業。我喺呢度住，經濟上唔需要政府幫，可以自給自足，如果將來被迫走，要交租都俾唔起，上樓要交租架嘛。

租屋住樓唔適合我架，我七十幾歲，要搬你都要來扶我上樓。呢度的鄰居，好像兄弟姐妹一樣，上車去錦田，邊個俾錢都有問題，仲好過兄弟姐妹。我七十幾歲，而家都有長期病患，這個環境令我健康，老人家氣管唔好，去到人煙多的地方，會透唔到氣，在呢度住一年，好過在外面住十年，外面廢氣咁多，要搬出去，環境、空氣，政府都俾唔到我。如果搬上公屋，遲d眼唔好，一把年紀好唔方便。

唔好話我地自私，每個人都自私架啦，有邊個唔自私，郁下叫我地犧牲，政府去犧牲睇下啦。而家政府搵我地村民好蝦，我地唔係原居民，賠償好少，劉皇發都話，原居民可以賠兩層，有地賠地，我都就賠少d，所以搵我地開刀。

政府要我扯，我唔扯，政府都有計架，你有理由叫我扯，如果抵抗唔到，人命抵抗都得，如果佢夾硬來，運架鏟泥車來，都係用條命去抵抗，堅決不遷不拆。

2009年5月14日